

東

華

續

錄

東華續錄

成豐三十九

臣 王先謙敬編

臣 陶澐宣恭校

八月丁酉朔荊州將軍官文奏截留川餉由總局分別支解得旨所留餉銀雖非蒙混開銷然找領欠餉及資遣回任回籍之用實非必不可緩之事況當茲帑項支絀斷不能悉依舊制嗣後萬不准視此爲常漫無限制朕謂汝不知緩急實非苛論○戊戌祭

大社 大稷○諭軍機大臣等前因銅斤短絀改鑄各項大錢與制錢相輔而行並諭令鋪戶軍民人等出入交易均須大錢制錢均勻搭配原期利用便民通行無滯慶惠文瑞等設局鼓鑄本係專鑄當百以下大錢惟見在民間行使大錢漸形壅滯該局如能兼造制錢於錢法更有裨益著慶惠等體察情形悉心籌畫將該

局能否兼鑄制錢若干之處速行覆奏將此諭令知之○諭勞崇
光奏龍州地方游匪竄擾戕官一摺龍州廳地方游匪陸成泰等
糾眾竄至那渠等村膽敢拒敵戕官該撫見已飛咨鎮道督帶官
兵馳往兜剿著卽嚴飭該員等迅將首要各犯悉數殲擒盡法懲
辦不准一名漏網廣西土匪本未盡絕根株此股游匪雖據稱原
係烏合業經四散然不及早撲滅難保不到處勾結又致蔓延該
撫惟當督飭各該地方官認真緝捕隨時懲辦消患未萌另片奏
請暫畱吳鼎昌並請飭催道府等官赴任等語已降旨允准至地
方緝匪安民首以吏治爲要著該撫卽於所屬各員中秉公察看
如實有官聲才具堪任道府者准其開單保奏其關葺不職之員
並著隨時甄汰毋稍瞻徇將此由五百里諭令知之○調胡林翼
爲湖北按察使文俊爲四川按察使林揚祖爲陝西按察使以余

炳燾爲河南按察使

由南汝光道遷

○以文格爲廣西按察使

由湖南衡永郴桂道

遷

○子廣西陣亡知府徐培祭葬世職○己亥諭軍機大臣等昨

因大錢行使漸形壅滯已諭令慶惠等體察情形悉心籌畫矣茲據戶部奏稱見在大錢倍形壅滯若以戶工兩局所鑄制錢配搭慶惠等所鑄大錢不但數目多寡不敵轉致戶工兩局所鑄大錢壅關不行請飭慶惠等自八月起做照戶工兩局章程按成配造以十成計算鑄當百大錢二成當五十大錢二成其餘六成鑄當十當五並制錢以便民用等語如此變通辦理當於錢法有裨著慶惠等妥籌辦理並著速行具奏原片鈔給閱看將此諭令知之○諭前因有人奏河南捻首李士林悖逆焚掠各情並光州知州趙登峻息縣知縣陳棠均有縱役聚賊情事當降旨令英桂查明參辦本日據奏李士林竄匿息縣所屬烏龍集地方皖豫官兵正

在圍勦得手該縣陳棠輒以兵單難禦爲詞經委員候補知府景昌飭令添募壯勇又以李士林已受楊需招安向景昌蒙稟遂令該擒首徑行赴楚以致沿途滋擾跟追官兵均有傷亡覽奏實堪痛恨該擒首被勦窮蹙飾詞投誠本難憑信該縣卽一時被愚亦應稟候英桂飭知再行遵辦何以遽令率領多匪竟往湖北其爲聽信通賊差役有意縱放已可概見委員景昌輕聽該縣面稟輒卽准其投誠汝甯府知府廖銓奉札追勦不能實力堵截均屬罪有應得陳棠著革職拏問交英桂嚴飭該革員將通賊之門丁差役悉數交出嚴行訊辦如該革員亦有通賊情事卽按軍律治罪景昌廖銓均著摘去頂帶責令將本省擒匪盡數按捕儘再不知愧奮卽著據實嚴參至九里關地方既有鄉兵堵截何以趙登峻追至該處旋卽折回所稱運掉不及之處尤不可信著英桂一併

嚴查有無畏愆故縱情事卽行參奏不得稍有徇飾至李士林一犯如果實心投誠何以沿途猶敢抗拒官兵狼子野心不問可知楊霈前次奏到朕卽覺其事無把握今沿途既有如此情形但事羈縻終防變幻該犯旣在軍營不難設法掩捕著楊霈仍遵前旨不動聲色嚴密查辦不可因其小有斬擒遽信爲實心歸順亦不可輕信屬員遂謂駕馭得宜當此軍務喫緊之際若畱此等匪徒在營不但於楚北軍情有礙且恐一有反覆則賊中並得知豫省虛實又啟窺伺之心所關匪細楊霈諒能體會此意不至受人愚蒙也將此由六百里各密諭知之○論邵燦奏淮城防堵喫緊勢難遠離一摺前以雷以誠未能赴皖諭令邵燦暫畱安徽辦理勸捐防堵各事宜茲據該漕督奏稱會審事畢後已於閏七月間回署見在瓜州賊匪思竄兼恐土匪竊發淮安地關緊要難以分身

赴皖所奏自屬實情邵燦著毋庸前往安徽卽將淮城兵勇督同該將弁等勤加訓練以資守禦並將勸捐米石行鈔鑄錢各事宜親身督辦至漕運爲該漕督專責本年蘇省海運僅止白糧六萬餘石全漕不能起運若年復一年於天庾正供大有關係且東南連歲豐稔小民豈不樂於輸將聞蘇省有漕州縣舊習相沿仍事浮收勒折刁生劣監與胥吏因緣爲奸率致抗糧釀禍大吏因循畏事遂致漕務日壞該漕督旣稱轉瞬秋盡須往蘇州督辦新漕卽著該漕督破除情面認真督催儻地方官催科不力或有藉口農民抗玩意存侵蝕等弊卽著從嚴參辦務期來歲新漕實力徵收開春後迅籌起運不至仍前貽誤庶蘇省漕務可望起色而浙省亦不至有效尤之患安徽甯池太廣道何桂珍有地方之責已諭和春等飭令速赴新任該漕督所請畱辦安徽防堵捐輸之處

著毋庸議將此由六百里諭令知之○諭前因瓜州軍務緊要仍令雷以誠會同陳金綬辦理並有旨諭令邵燦於行抵安徽後暫畱該省籌辦勸捐防堵事宜茲據該漕督奏稱淮城防堵亦甚喫緊勢難再行折回皖省等語所有安徽見在設防督剿及一切勸捐濟餉各事宜仍著和春福濟會同袁甲三實心妥辦既不可稍存意見亦不得互相推諉總期勦賊籌餉兩有裨益各專責成而免貽誤安徽甯池太廣道何桂珍簡任半年有餘何以遲遲至今仍復羈畱江北公然以無任可到爲解往來於廬州臨淮妄以請兵策應等詞紛紛瀆請希圖苟安竟置本任於不顧見在太平府業經收復地方善後諸事及蕪湖關徵收稅課在在均屬緊要若任令該員藉詞逗畱尙復成何事體著福濟等卽行嚴飭赴任斷不准再事遲延致干咎戾至在皖辦理團練之道員趙昉於上年

十二月間據袁甲三覆奏因病由廬州回太湖縣原籍見在該員
是否病痊究係逗留何處各路奏報何以迄未敘及並著該提督
等確切查明如實有賊匿偷安情事卽行奏明辦理將此由六百
里各諭令知之尋奏該道員趙昉病居太湖趕緊調治稍愈卽赴
行營報聞○庚子諭軍機大臣等陳金綬雷以誠奏浦口防剿情
形一摺逆匪圖占浦口洲地建築水營業經疊次諭令陳金綬等
設法剿除卽陳金綬等屢次奏報亦稱督飭武慶會同李德麟等
水陸夾攻何以此次武慶與江浦六合兩縣分帶兵勇進剿而李
德麟猶以阻風爲詞以致賊營築就如果李德麟於奉札後卽時
上駛該逆斷無立足之地何必專待吳全美葉常春師船回剿始
能杜其奸謀今賊壘已成李德麟既藉詞推諉不能不如所議飭
令吳全美帶船駛回但此時江面攻剿正在得手太平甫經收復

蕪湖萬分喫重吳全美師船折回後上游太覺空虛尤須嚴防皖楚賊踪大幫回竄著向榮一面飭知吳全美迅從上游順流夾擊一面妥籌太平蕪湖一帶布置機宜不可顧此失彼徒令得力師船往來行駛轉致兩無裨益至李德麟等所帶艇船上年株泊焦山幾及一年直至琦善嚴札催提始開赴瓜州以上協勦琦善一經出缺又復玩泄耽延屢催不進專待借力於紅單船隻試思紅單船入江原爲肅清江面節節進勦並非爲帶艇各員藏身自固地步設吳全美回勦得手竟將賊營奪毀李德麟又將以協勦居功此等狡猾之員竟至不能驅策陳金綬等何輒弱至此耶洲地突漲江心必須水師圍勦不能專恃陸路官兵武慶旣屢次進攻甚爲奮勇葉常春趕緊回駛亦合機宜著再嚴飭李德麟先就見有之船剋日前進務將賊壘立時掃蕩若能迅速毀除則吳全美

仍可專力上游不至掣動大局儻再有心延宕卽著陳金綬等據實嚴參不得稍存姑息琦善所造多槳快船見在當已竣工此項船隻以之進攻洲地賊巢較紅單船尤爲便捷應作何布置之處亦著迅速具奏至江西應解金陵軍餉前據向榮奏稱自三月以後迄未解到曾經降旨飭催本日陳啟邁奏因湖南需餉甚急已將江南月餉四萬兩改解湖南見在九江時有逆船義甯等處復被賊擾本省用款甚鉅而司庫存銀止有萬餘所陳亦係實情已諭知該撫續有收款卽行源源起解仍著向榮咨催葉名琛柏貴懍遵前旨籌款解赴金陵以資接濟將此由六百里加緊諭知向榮陳金綬雷以誠並傳諭武慶知之○諭陳啟邁奏擊退賊船調兵援救武甯一摺前次由九江入湖下竄之賊經趙如勝等帶兵駛抵吳城立將逆船全數擊退其旁竄建昌賊匪亦被官兵鄉團

擊敗逃遁近省一帶雖漸肅清惟該逆烏合之眾一聞官兵進剿遂卽紛紛退竄並未大受懲創省垣重地尤應刻刻嚴防勿令賊蹤復行闖入其武甯大股屢次撲擾見旣進攻失利又有分股潛竄義甯邊境陳啟邁所稱派令吳錫光帶勇前往武甯會攻並派千總楊錦斌等帶勇赴靖安以堵爲援仍由省添撥官兵助剿籌畫尙是但不知該員弁等是否可靠或須另派大員前往督勦著隨時酌度妥辦道員王訓所帶之兵卽飭令仍駐義甯實力籌勦此時塔齊布曾國藩等東下之師已追至嘉魚蒲圻一帶恐楚境下游逆匪聞風潰竄更向東南奔突則義甯陸路邊界與下游九江門戶均當其衝以目下情形而論嚴防義甯要隘迅解武甯城圍嚴扼姑塘湖口在在均關緊要該省兵力雖單他處亦無可調撥惟當就本省兵勇船廠或勦或防妥爲布置仍責成趙如勝等

督兵嚴備江防一面迅飭義甯帶兵各員安速勦辦總期熟計統籌毋稍疏失另片奏應解兩湖餉銀除解過四萬兩外尙難卽時應解等語亦係實在情形著准其俟續有收款卽行如數起解該撫仍當督飭所屬設法催徵毋得藉詞諉卸致誤要需將此由六百里加緊諭令知之○荊州將軍官文等奏官兵收復嘉魚蒲圻二縣仍由清潭口進勦報聞○予江西陣亡遊擊富克金泰知縣劉馨朝等祭葬世職○辛丑諭軍機大臣等勝保等奏連日撥兵築壘並用大礮轟擊一摺逆匪竄踞高唐堅匿不出該大臣等前次已偏近賊巢紮營建築礮臺見復於正北西北連築三營並用大礮轟擊覽奏各情不過專恃礮力攻擊仍未能明攻暗襲爲一殲除之計逆匪雖係死黨而爲數無多我兵圍勦已及四月亦豈無隙可乘若始終遷延致敗竄餘匪牽掣全局師老餉糜罪將

誰諉況該逆見我軍逼近安營勢必亟思竄逸該大臣雖已分派各路聞信追剿而能否杜其奔突必須先事豫籌妥爲布置斷勿令其蔓延他處致剿辦又形棘手該大臣等惟當懷遵屢次嚴旨迅圖克復務將此股逆匪就地殄除毋得日事耽延致干重罪將此由六百里加緊諭知勝保並諭德勒克色楞善祿崇恩知之○諭袁甲三奏皖省賊匪情形擬親自帶兵進剿並辦理銷鹽各等語安徽賊蹤自廬州以南十餘州縣均遭蹂躪見在俞家灣匪巢經官兵擊破壽定一帶漸就肅清附近廬營無慮旬結此時若能出偏師繞赴南路斷廬賊接應之道不但廬南各屬可望廓清且翦其逆黨卽廬郡勢成孤立亦易收復袁甲三旣令紳民方正等密行糾約多備糧米正當趕緊發兵進駐六安糾齊義旅以爲擣穴擒渠之計著卽迅速布置督率兵勇乘勢進取或應同時並舉

或先攻一二處袁甲三到六安後隨時斟酌勿稍拘泥惟深入重地謀事尤當慎密六安與臨淮一水可通卽正陽三河尖等處亦可就近控制所有臨淮防守事宜雖責成廬鳳道張光第妥辦袁甲三仍應防勦兼籌北路防守不容稍懈毋得顧此失彼其各城被占均係本地紳民爲軍帥旅帥著袁甲三查明從逆姓名速行具奏愚氓無知被其裹脅果能悔罪投誠原可予以自新之路若官紳忍辱偷生甘爲賊用亦當隨時查明嚴加懲辦不得概以被脅非其本心倖逃法網淮北鹺務曾據怡良奏暫停代納淮南懸引可以維繫新綱已有旨令該督會同楊以增實力疏銷見在河路已通鹽價漸起仍歸怡良督辦以期畫一雷以誠已畱揚州其如何不令逆匪重擾和含句結廬州賊匪爲患著知照和春等擇要防守另奏統籌全局一摺水陸扼要上下游併力夾攻誠爲得

計惟此時長江千里皆爲賊擾布置爲難一俟武漢黃州等處江路漸通即可擇要扼守遏賊往來之路原摺留覽將此由六百里加緊諭令知之○裁山西馬步守兵五千八百七十名○壬寅諭內閣前因勝保圍攻高唐未能克復降旨拔去花翎以示薄懲原冀其感奮圖功迅殄醜類以贖前愆乃圍剿已及四月我兵雖逼近賊壘紮營仍未能剋期收復似此遷延觀望糜餉老師實屬大負委任勝保著卽革職仍著督率將弁迅圖克復儻再玩延朕必從重治罪○諭軍機大臣等前聞廣東土匪攻破東莞等縣直撲省城已諭令葉名琛等攻復縣城嚴拏土匪矣本日有人奏五月閒廣州匪首何老六袁玉山聚眾二萬攻撲東莞縣屬之石龍鎮縣丞卜兆鼇遊擊李鳴琛均已躲匿知縣江肇恩彈壓受傷逃至省垣都司莫姓禦賊被戕該處快蟹船巡丁半係三合會匪因江

肇恩急索陋規致巡丁懷恨起釁離省三十里之佛山鎮已被該匪挾括燒毀掠及南海順德各村莊並有窺伺順德之意兼恐各處會匪土匪互相勾結更難撲滅著葉名琛柏貴迅速查明該縣激變根由從嚴參辦一面設法搜捕匪首並飭各屬認真辦理團練毋致有名無實原摺著鈔給閱看將此由六百里諭令知之○諭勝保勦辦逆匪屢著戰功此次竄踞高唐之匪數僅千餘該大臣統帶重兵圍攻四月之久葢爾孤城竟不能剋期收復疊經嚴旨飭催並隨時指授機宜不啻至再至三乃昨閱所奏各情仍不過添築營壘施放大礮於攻勦事宜竟毫無把握勞師糜餉日久無功該大臣中夜自思能無自愧朕聞逆匪初踞高唐勝保在城北十五里外紮營逗畱數日致逆匪得以從容布置復藉口製造攻具日事耽延所帶兵勇旣漫無鈐制而所釋山東監犯竟有脫

逃及投入賊營情事大營時有奸細探聽號令逆賊每假充官兵
滋擾知州黃良楷帶勇登城勝保營中忽礮聲大震致賊驚覺拒
斃上城之勇後遂無敢登城者又聞勝保接見文武慢不爲禮與
共事諸臣不能協和惟善祿善伺喜怒爲勝保所袒護張起鵠貪
緣拜爲師生侍衛蘊秀編修楊翰候補知府馬文鋒知縣韓瑞東
聲名平常皆所信任南河候補知府尹紹烈並未隨同追賊勝保
竟以道員蒙混請獎營中兵勇漫無約束甚至出外淫掠誣指棉
花張家莊爲賊莊焚燒一空所差官弁兵勇需索供億日不暇給
糧餉軍裝車馬兵勇任意扣留官民交困種種款迹未必無因朕
亦不難從嚴查辦惟當此勦賊喫緊之時該大臣果能迅奏膚功
盡殲醜類朕不惟不過事苛求兼可重加懋賞儻該大臣志氣驕
盈以致軍無紀律捫心自問當得何罪該大臣其痛自省愆迅圖

殄寇如敢仍前玩世朕惟有執法從事懷之將此由六百里諭令知之○諭給事中毛鴻賓奏見辦防堵情形一摺並片陳勸諭捐輸及借款歸款等語山東自上年辦理防務以來其歷城縣四鄉及長清齊河兩縣要隘地方節經該紳士毛鴻賓等舉行聯莊糾約團壯藉助聲威並先後雇覓民勇約一千餘人在大清河東岸及齊河縣城西分設營盤三處並於歷城等三縣交界之數百村莊分期會哨崇恩前次由省城出勦東路防堵情形亦稱沿途一帶或扼河立營或挖濠設塹莊團俱極聯絡見在高唐逆匪攻圍四月有餘我兵礮臺愈形逼近難保不鑿而走險所有大清河一帶各要隘爲省垣門戶 崇恩仍飭紳團勦加訓練擇要扼守毋稍鬆懈至紳團借用藩運兩庫銀兩共計一萬六千兩本由捐局項下歸還據奏此時防堵正值喫緊勇眾口糧未能遽議裁減三

營及防卡各項每月需銀二千八百兩仍須兩庫暫行接濟等語當此防務緊要固不能不先籌借領而經費支絀尤當嚴汰虛糜著崇恩督飭藩運各司並該紳士等撙節經費竭力勸捐俾庫款不至虛懸於防務亦無窒礙方爲兩全之策原摺片著鈔給閱看將此由四百里諭令知之○諭有人奏河南息縣知縣陳棠與捻匪往來已革總兵柏山奉委剿匪並未開仗光州直隸州知州趙登峻都司楊鼎金藉詞逃避羅山縣知縣雷元昭與捻首趙廷羣換帖並借團練爲名歛財人已等語該省捻匪橫行地方文武果能實力兜拏何至脅聚黨與至十餘萬之多英桂身任巡撫戢暴安良是其專責若如所奏地方不肖州縣膽敢與捻匪交通任其肆擾吏治廢弛至此實堪痛恨著英桂按照所參各情一併根究務得確情按律懲辦毋得稍有徇隱致干重咎並據奏稱署固始

縣知縣蒯賀孫勦匪出色署商城縣知縣秦茂林屢保危城甚有
膽略署羅山縣知縣鄭元善獲匪甚多署太康縣知縣祝塏勦捕
得力息縣外委海進忠熟於勦賊候補都司馬春華緝匪認真六
品軍功張亮齊人甚驍勇均著英桂隨時察看酌量委用原摺著
鈔給閱看將此由五百里諭令知之尋奏豫省捻匪疊次勦捕地
方較前靜謐柏山畏蕙巧飾趙登峻辦事竭蹶陳棠聽役庇匪楊
鼎金始勤終怠已先後參劾撤任雷元昭尙在提訊祝塏蒯賀孫
鄭元善已擬保奏海進忠勦匪奮勇馬春華頗著勤能當隨時察
看委用惟秦茂林到任未久並無屢保危城之事張亮齊查無其
人報聞○癸卯諭內閣前因大錢行使壅滯諭令慶惠文瑞仿照
戶工兩局章程分成配鑄制錢以便民用茲據奏稱制錢一項因
銅斤短絀僅能專用鉛鑄等語見在戶工兩局於按成鑄造大錢

以外加鑄鉛質制錢與各項大錢相輔而行已足以資周轉慶惠等因銅斤不敷未能添鑄制錢自係實情其鉛錢一項既有戶工兩局鼓鑄所有慶惠等見設錢局著卽停止將以前捐輸銅斤及鑄錢數目一併移交戶部該部於寶泉局或議添鑄或議加卯及工匠人等分別去畱酌量辦理嗣後捐輸銅斤亦交該部收捐以歸畫一至慶惠等設局以來承辦各員著有微勞著擇其尤爲出力者與捐銅人員一併覈實請獎毋許冒濫○諭僧格林沁等奏逆匪突圍撲擾官兵續獲勝仗一摺連鎮逆匪被我兵圍攻屢次出巢撲擾本月初二日夜間分四面放槍衝突因官兵嚴整以待隨即退回至初三日夜間復分四面來撲並有大股賊匪乘坐大船木筏蜂擁駛奔水口經散秩大臣穆輅護軍統領珠勒亨等督兵開放槍礮連環轟擊並拋擲噴筒火彈將該逆船隻擊沈燒毀

斃賊無數並將偽總制廖姓轟斃奪獲撫牌竹盃刀矛火藥礮子等無算逆賊困守連鎮疊被懲創窮蹙已極著僧格林沁等督率官兵迅速進攻無任久稽顯戮穆輅此次擊賊尙屬出力著賞還頂帶仍帶革職畱任處分○諭軍機大臣等前因金陵上游紅單船較少特允向榮所請令於陳國泰所帶船內分撥十隻或十五隻赴上游協剿原以金陵以上江面遼闊師船二十餘隻不敷剿洗下游紅單挖管廣艇等船共有八九十隻又有新造多樂快船是以准其酌撥嗣因逆匪於九洲地方占紮賊營李德麟延不進剿復諭向榮酌調吳全美帶船回駛亦爲先其所急見在洲地賊營是否業已攻毀向榮本日所奏調集師船與浦口六合練勇四五千入會齊夾擊卽著陳金綬等傳知武慶迅速進攻不可再有延緩至此次江面師船續獲勝仗已近東西梁山緣該處逆船

甚多又有夾洲遮隔未便深入重地固因船數較少不得不加意
慎重但此項師船上駛之後賊援已漸斷絕若竟以船少勢孤坐
守采石不能泝太平而上進扼梁山則江面要截之策仍係有名
無實若因下游船隻較多添調助剿固足以壯聲威而浦口地方
見在又萬分喫緊權其輕重自以各就各船分投進剿爲要策前
次既有准調陳國泰師船十隻十五隻之旨卽著向榮與陳金綬
等遵旨妥辦一俟兵力稍厚卽可由太平上駛徑達東西兩梁山
埽淨賊踪以圖次第攻剿至上方橋賊營萬不可任其久占秣陵
關通賊棚民尤應迅速剿捕該處關繫蘇常要隘怡良是否已抵
常州著向榮知會該督於溧陽金壇一帶加意嚴防不准稍有疏
失將此由六百里加緊各諭令知之○甲辰諭內閣王懿德奏匪
徒拒捕戕官見飭剿辦一摺福建漳浦縣古竹社地方有匪徒蔡

姓聚族逞兇先因大兵克復漳州該匪四散逃匿撤兵後仍復嘯聚擄劫經署漳浦縣知縣陸友仁會同署左營遊擊黃文郁署守備李光生管帶兵勇馳往勦捕該匪等竟敢抗拒李光生手刃三賊致被賊眾砍傷並將陸友仁戕害李光生因傷殞命黃文郁亦身受多傷土匪拒捕戕官罪大惡極亟應速行勦滅以伸國憲著王懿德卽飭該鎮道等迅速統兵馳往勦辦務將首要各犯殲擒明正典刑以昭炯戒○諭軍機大臣等陳金綬等奏瓜州逆匪糾黨分突官兵奮擊獲勝一摺江路逆匪自艇船上駛後援應漸斷惟鎮江瓜州兩岸逆匪聲氣尙通此次糾合死黨過江攻撲雖經我兵大加殲戮特恐該逆受創之後伏匿愈堅必須迅速設法破其巢穴鎮江與瓜州江口對渡瞬息可達果能乘此聲威剋日進攻並飭余萬清同時並舉該逆自必急不相顧至江面師艇上駛

者已至瓜儀以上停泊者尙在焦山以下雖云聲勢聯絡而瓜鎮
兩口仍復任賊來去自由勦辦終難得力焦山迤上之象山北固
山暨對岸之順江洲上下均有礮隄自被賊占踞後總未議及設
法奪回金山賊築礮臺又復梗塞江路我兵戰船卽有駛至甘露
寺之時往往接仗卽退不敢停泊是水軍終未占據勝勢無怪該
逆日久負嵎著陳金綬等督飭將弁一面速攻瓜州一面約會余
萬清各派奇兵由閒道暗襲礮隄使兩岸賊勢隔絕更屬易於得
手浦口洲地賊營萬不可任其久占前此疊降諭旨均係緊要機
宜著陳金綬等傳知武慶嚴飭李德麟水陸並進務期平毀淨盡
不准稍有遷延陳金綬等前奏洲地賊營僅有一座據袁甲三奏
有逆匪於附近北岸之新灘等處紮營三座之語是否續被占紮
抑係分占各洲總宜悉力進攻若再事耽延必致更難攻克陳金

綬等不可視同泛常也奸民接濟火藥亟應嚴行斷絕前次陳國泰所獲運米資賊小船卽有火藥槍子等件在內恐此外尙復不少著嚴飭水陸各營並附近地方文武明查暗訪一體搜拏毋任稍有漏網將此由六百里加緊諭令知之○以國瑞爲內閣學士由副都統遷○乙巳予福建殉難典史亢家驥等祭葬世職○丙午諭內閣和春福濟奏晝夜環擊廬州賊匪連次獲勝並克復英山縣城各一摺自逆匪竄踞廬州屢被斬擒閏七月十八日經和春等督飭官兵紮筏過渡用大礮向城內轟擊該逆由南門突出二三千人來撲吉順等帶領兵勇奮力攻擊斬敵多名常清等亦由大西水西各門趕至三路夾攻斃賊不計其數二十二日賊匪由南門突出千餘人程智泉等帶勇迎擊並會合嵩瑞常清等督兵攻勦斃賊二三百名其由巢湖駛入之賊經和春等親督官兵率同

練勇奮力圍攻約斃賊匪二百餘名生擒僞軍帥周鴻江並著名賊目十二名八月初一日常清等帶領兵勇進攻西門得勝門由城內突出賊匪千餘人常清等三面夾擊斃賊二百餘名餘匪敗入城中伏匿不出此股賊匪屢被痛勦勢甚窮蹙著和春等督飭兵勇奮力進攻迅圖克復郡城毋稍鬆懈其竄踞英山之賊經和春等派委六安州候選知州李元華候補知州博勒霍布六安州知州茅念劬等相機籌辦二十一日博勒霍布等督同紳勇直抵城北之竹絲嶺前隊祝澂鑑等奮勇進勦賊眾紛紛驚潰生擒長髮賊九名二十二日徐振清樊文鐸等由北路越山直撲城下將附郭民房燒毀賊匪見北路火起越城逃走練勇追勦殺賊二十餘人江繼陶等由西南城垣蟻附而上殺斃守塚賊匪六人樊文鐸等砍伐樹株梯城而入殺斃守城賊目四名我軍一擁入城將

匪按殺淨盡並將逆首張和尚殺斃立將縣城克復該逆自上年冬閒竄入英山盤踞蹂躪經官紳團勇等奮力攻勦殲斃逆首克復縣城辦理尙合機宜所有在事出力官紳並陣亡義勇著一併查明分別奏請恩施以昭激勸○諭軍機大臣等本日春福濟奏賊於草鞵夾放船百餘隻又在浦口北岸中路與八字溝各築營盤夾新灘亦添設礮位其和州鉞魚嘴地方並有賊船三百餘隻游駛該提督等因夾江已有賊營慮其由烏江一帶竄擾復踞和合接應廬賊請飭雷以誠於揚州軍營抽撥兵勇一千名從儀徵六合馳赴和州督率嚴防等語見在金陵上游水軍屢獲勝仗南岸陸路經向榮分兵駐紮江浦情形較前喫重和春等所稱和州含山亟須堵禦原係實情惟昨據陳金綬等奏攻勦瓜州賊匪東西兩岸甫經得手正當迅速督率水陸各軍破其巢穴托明阿

啟程已久計當抵揚著通盤籌畫雷以誠是否能親赴和州瓜州
攻剿當喫緊之際或於儀徵六合等處防兵內酌撥兵勇前往堵
防之處務須妥籌辦理並將能否分兵之處飛咨和春等以免貽
誤不得顧此失彼將此由六百里加緊諭令知之○予安徽陣亡
遊擊吉蘭泰等祭葬世職○戊申諭內閣親王銜定郡王載銓會
同戶部遵議疏通錢法條款一摺近來大錢壅滯皆由私鑄過多
果能嚴禁私鑄隨地查拏俾得淨絕根株則販賣私錢之人不禁
自絕卽使用私錢之禁又何必另立章程若不正本清源徒以嚴
拏私販紛紛擾累適足以啟官役訛詐之端於禁私便民之道轉
多窒礙著照所議嗣後責成步軍統領衙門順天府五城及各該
地方大小員弁懷遵疊降諭旨於私鑄大錢人犯實力嚴拏其有
拏獲大夥私鑄及私造鑄錢器具並鄰里軍民首告得實者應卽

給子獎敘如官役有徇隱包庇受賄賣放挾嫌誣告情事及奸民知情容隱者尤應加等懲處其所稱鄉民攜帶大錢不准擅自投查之處並著步軍統領等衙門一體出示曉諭以免藉端滋擾至官號爲銀錢出入總匯儻有收買私錢任意折算等弊尤須從重懲辦著戶部嚴飭該管司員嚴密稽查一經發覺卽將該商人等拏交刑部治罪不得稍涉瞻徇致令市肆奸商相率效尤阻壞錢法○庚戌諭軍機大臣等陳金綬等奏官軍進逼賊巢復獲勝仗一摺瓜州賊匪環城列壘引水注濠初五日陳金綬督飭東西兩岸官兵填濠搭橋毀其近卡礮臺斷其橫河鐵鍊並施放槍礮斃賊多名惟艇船因風微不能停泊夾擊以致未能得手瓜州濱臨江岸必須水陸同時進攻使該逆四面受敵始可乘勢力破賊巢此次陸路官兵已獲勝仗而陳國泰所駕礮船僅擊卸靠江土城

一處旋即退去所稱風色不利殊難憑信水師疲玩積習最堪痛恨著托明阿等嚴飭水陸各將弁務當乘此聲威同時並進剋期收復瓜州儻此進彼退不能互相接應查明何路延緩即將何路貽誤之員嚴參懲辦逆匪屢被攻勦難保不計窮思竄著該大臣等一面迅速進攻一面嚴防該逆分竄之路總期一鼓殲除毋令再滋延蔓逆匪於浦口江浦之間北岸又添數營並於西北開出路徑三條可達江浦縣城及和州全椒等處雖經調撥六合儀徵等官兵馳往防勦是否足資堵禦著飛飭武慶等督率水陸兵勇迅將北岸賊營擊毀杜其北竄之路其焦山等處賊隄並著仍遵前旨設法奪回毋稍延緩致誤事機將此由六百里加緊諭令知之○河南巡撫英桂奏查辦廢弛捕務州縣並稱在籍給事中陳壇供情尙有不實不盡由司議擬亦未恰當復駁飭確審另詳得

旨陳壇身任給諫又係奉旨回籍辦理團練乃如此喪心若不從嚴懲辦何以勸各省出力紳民著迅速奏來斷難任其避就欺罔倖逃法網尋奏陳壇並無隨同宋錫慶打斷關鎖先逃情事惟賊至不能捍衛輒因兵勇潰散隨眾逃避實難辭咎擬發軍臺效力贖罪下軍機大臣會同刑部議從之○辛亥諭軍機大臣等勝保等奏連日擊賊偪城紮營一摺並瀝情自陳等語覽奏雖小有接仗斃賊無多我兵復有傷亡未能得手該大臣布置數月之久乃至今日始知賊情必思南竄甫爲空濠之計而於南關外民居牆垣竟未能及早拆毀所築營壘又未能一律趕緊辦齊復曉曉以步隊不足爲詞殊不可解用兵貴兼謀勇豈能專藉兵力古人以少擊眾在乎審幾神速切忌稍事遲疑該大臣前此造雲梯造呂公車築臺鑿礮展轉因循徒延時日卽以兵力而論豈有巨萬兵

勇不能舉此孤城而令千餘逆匪得以負嵎堅拒之理明知連鎮官兵不能再分便不必宛轉解說妄冀添調豈將以遲延之咎欲令連鎮大營分誘耶果能迅籌攻克俾東土人民早登衽席不但人心悅服卽軍士亦復騰歡安得更有訛言該大臣就事論事總以高唐之能否克復此股賊匪之能否掃除不至更令蹂躪他處爲憑與搢紳之跋扈何涉遁辭知其所窮該大臣自問能無羞愧著勝保與德勒克色楞善祿崇恩勩力同心剋期攻復州城盡殲醜類毋得致令竄逸若再耽延貽誤國法具在不能以該大臣曾有微勞曲爲寬宥也將此由六百里加緊諭知勝保並諭德勒克色楞善祿崇恩知之○塔齊布曾圖藩奏逆匪竄回武昌後臣等本欲乘勝東下直擣武漢旣而再四熟商陸路之賊尙有崇陽大股數逾二萬卽自岳竄出者分匿於臨蒲咸嘉等縣山僻之處亦

恃崇陽爲巢穴若不先剿崇邑大股而遽下武昌恐後路牽掣餉道中梗終非萬全之策水路則東有倒口六溪口黃蓋大冶密泉等湖西有襄河上通洪湖朱耳湖下通沌口漢口若非節節搜剿則恐藏匿小舟鈔襲後路亦非慎重之道是以審度定計陸路則臣塔齊布親往崇陽進剿水路則臣國藩步步移營徧搜支湖小河然後扼險要以蹙之閏七月初十日探明黃蓋湖內之新店尙存賊船數十號有賊千餘人遊擊楊載福等親駕長龍三板由倒口入湖初更時行至芑茅湖距新店三里許楊載福等將長龍船盡紮湖濱各坐三板駛進突放槍礮該逆猝出不意轟斃者無數餘皆上岸狂奔楊載福首衝賊隊被賊回擲火包舟覆落水旋卽躍上守備蕭捷三坐船大呼突陣將賊船四十餘隻登時燒盡並將芑茅湖山後賊船及沅潭市聶家市各船燒毀一空黃蓋湖等

路亦按捕無遺直抵嘉魚縣城副哨官馮登等會同官文派到兵
勇合剿附城大股該逆竄入崇陽知縣孫守信等入城安撫居民
各營水師始行收隊回紮新隄老營東岸按勦已徧乃遣嚮導官
何南青按查西岸裏河一律肅清於是水師乘勝直下金口扼據
要隘距武昌僅六十里矣金口之東有淮山西有大軍山小軍山
兩岸對峙關鎖謹嚴爲水路必爭之地該逆不虞我軍猝至乃乘
我大隊未齊水陸兩路來犯蕭捷三等嚴陣以待各哨官分駕三
板往西岸大軍山下遏賊上竄陸賊千餘人先由淮山越嶺而來
直入金口市冀誘我軍登岸而以小艇突入奪我戰船隨有賊舟
百餘號分兩翼來鈔我軍亦分兩路迎擊將該逆快船轟壞並擊
沈小船二十餘隻水賊始行敗走陸賊亦敗北回竄此按勦湖匪
及金口水師大勝之實在情形也臣塔齊布既定親剿崇陽之策

知崇陽臨蒲三縣以羊樓洞爲總隘必紮老營於此然後可以四面策應遂督率各營馳赴羊樓知府羅澤南率湘勇千人先行十七日宿長安驛十八日賊千餘人乘我不備分四路撲營羅澤南令湘勇誘賊近營突出鈔尾賊眾大潰次日進紮羊樓洞各營次第皆到四川臬司胡林翼亦自常德帶勇來會臣塔齊布探明附近羊樓洞山崖險峻爲赴崇第一關隘遂派羅澤南於二十三日出隊進剿該匪於洞尾盧家橋紮立大營中跨溪水闌截隘口我師直抵賊穴踰溝踏破賊營墮崖死者甚多盧家橋之卡旣破賊眾悉銳踞守佛嶺佛嶺南山高峻羊腸一縷尤爲險絕二十四日羅澤南等督勇由佛嶺之東西北三面分路直攻賊巢攀巖踰嶺冒險而進賊眾大潰我兵追奔十五里至雙港口止二日之內東西兩卡皆破崇陽首逆僞總制廖敬瞬探知我兵大隊未進在羊

樓洞者不及千人乃自崇城調賊三千餘名前來二十六日猝至羊樓洞尾四面環攻羅澤南率勇迎勦振鼓馳突賊勢瓦解我軍中路之兵乘勢擁上山岡追至盧家橋約七里許殺賊二百餘名蕭啟江追右路之賊圍入石山內殺賊百餘名餘賊竄匿墜崖死者無算此陸兵連破賊卡及羊樓大獲勝仗之實在情形也有此數戰崇陽股匪業已膽寒臣塔齊布見統大隊進攻臣國藩見駐嘉魚卽日馳赴京口一俟崇陽股匪勦畢卽當水陸並進直擣武昌探明武漢賊黨不過二萬餘人自岳州大敗人有離心臣等宣布告示解散脅從自賊營雜髮逃出者幾四千人又北路有署督臣楊需之兵西岸有魁玉楊昌泗之師聲威大有可恃然臣等仍當慎之又慎不敢萌驕矜之志不敢貪急速之功以期仰慰聖懷於萬一得旨此時非徒知謹慎所能了事汝等自湘潭大捷後

屢次得手有此聲威豈可自餒惟利在速戰莫待兩下相持師勞
餉乏大有可慮塔齊布不至爲崇陽一股牽掣方好○予山東陣
亡副將吳燦祭葬世職○癸丑諭軍機大臣等葉名琛柏貴奏逆
匪句結日眾郡縣相繼失守請調兵會剿一摺覽奏曷勝焦急江
南逆匪潛遣夥黨回粵句結醜類同謀滋事各路匪徒乘機竊發
同時並起以致高明順德惠來等縣被陷肇慶府城失守並敢攻
撲省垣見在賊勢猖獗已極該督撫等平日所司何事於逆賊句
結肆擾竟漫無覺察殊堪痛恨近省北路賊匪眾至四萬東路之
燕塘墟等處賊眾亦有數千雖官兵攻剿屢獲勝仗而該逆以佛
山爲老巢並欲糾眾聚於省垣此時省城情形更爲喫緊閩楚官
兵到粵尙需時日該督等務當督率滿漢官兵多募練勇迅將近
省一帶逆匪剿除淨盡並設法力破賊巢則各屬匪黨自必聞風

解散該省紳士素明大義如果開誠布公勸諭紳民一體團練較之徵調客兵尤能得力海陽等縣賊匪蠶起北礮臺已被賊踞潮州郡城勢極危險該督等務嚴飭該地方文武實力防剿一俟兵力可分卽當統籌兼顧該匪事起倉卒必多烏合之眾該督等務於水陸兩路迅籌剿辦毋令日久蔓延爲患將此由六百里加緊諭令知之○予江西傷亡江甯將軍蘇布通阿祭葬世職○調湖南福建兵各一千名赴廣東剿賊○甲寅諭內閣駱秉章奏疊次攻剿通城賊匪克復縣城等語賊匪竄踞通城屢被官兵攻剿殲斃多名七月二十九日賊匪大股擁出江忠淑等督勇迎剿槍礮齊施殲斃賊匪二百餘名復出奇兵從後鈔出斃賊百餘名並殺死僞軍帥蔡姓賊目廖四廖六等閏七月初七日夜賊匪潛開城門由北路逃竄江忠淑等偵知帶勇四路截擊斃賊三百餘名奪

門直入復斃賊百餘名生擒八十餘名奪獲槍礮旗幟多件米二千餘石立將縣城克復見在通城餘匪尙未淨盡著該撫督飭兵勇迅速搜捕務當盡數殲除毋畱餘孽所有在事出力各紳勇著查明酌保毋許冒濫○諭上年因廣西桂林湖南長沙及河南懷慶開封許州等處士民深明大義協同官兵擊退賊匪保全城邑業經降旨酌加學額以示獎勵因思江西南昌府城上年被圍日久省會紳民嬰城固守至三月有餘秋閒賊匪竄擾天津該處紳士捐餉集團力捍兇敵均屬義勇可嘉允宜破格施恩用昭激勸所有江西南昌府縣直隸天津府縣學額著該部查明酌擬加增額數具奏以作士氣而勵民心○諭軍機大臣等昨據葉名琛柏貴奏各路匪徒竊發高明順德惠來等縣並肇慶府城相繼失守近省北路東路匪黨甚多膽敢攻撲省城廣東情形萬分喫緊據

奏兵力不敷係屬實情肇慶與廣西梧州一帶接壤見在郡城被陷逆勢猖獗而省城又被賊撲恐該督等調兵援應肇慶有鞭長莫及之勢廣西雖土匪未絕根株省城又少大員惟廣東軍務尤爲緊急不能不統籌兼顧著勞崇光體察情形設廣東因省城被圍不能顧及肇慶卽著惠慶鎮守省城該撫親帶兵勇出境勦辦或另行揀派大員帶兵前往會勦該撫先於毗連肇慶地方擇要駐紮相機前進斷不可稍分畛域致該匪愈形滋蔓至本省防勦事宜卽著該撫會同惠慶督同地方文武嚴密布置不至顧此失彼方爲妥善葉名琛等閏七月初二日所發摺件係由海道遞至浙省由驛馳奏驛路梗塞文報遲延朕心實深懸繫著勞崇光設法疏通驛站並探明廣東近日賊情隨時馳奏毋稍延緩將此由六百里加緊各諭令知之○諭駱秉章奏請飭升任湖北藩司夏

廷樾在川省督辦勸捐等語見在曾國藩等統領水陸各軍東下
勦賊屢獲勝仗勦辦正在得手惟需餉浩繁湖南閩省捐輸尙難
久支供億湖北新遭蹂躪亦恐籌畫維艱廣東自七月以來匪徒
滋擾鄰省軍資更難令其接濟四川省素稱殷實果能實力勸諭
捐輸當可踴躍著照駱秉章所請卽令夏廷樾在川籌辦勸捐協
濟兵餉裕瑞接奉此旨卽傳諭該藩司認真督辦惟夏廷樾甫抵
川省於該省情形未能熟悉且各路勸諭亦必需人助理並著裕
瑞揀派公正賢員幫同該藩司妥爲籌辦務須設法勸導不可稍
事擾累一俟辦有成效仍飭夏廷樾迅速回楚不准在川逗畱將
此由六百里加緊諭令知之○諭本日據駱秉章奏見籌南路防
堵情形並探知東省仁化樂昌兩縣盜蹤蠢起清遠英德乳源各
縣亦被賊擾韶州府城聞有圍攻之信連州三江營並皆危急雖

與葉名琛等昨日所奏詳略微有不同而粵東賊匪猖獗勢已蔓延楚南所屬如郴州宜章桂陽興甯臨武一帶地皆犬牙相錯韶州以北道路紛歧誠有防不勝防之勢該撫所陳宜章一路可以兼顧臨武桂陽一路可以兼顧興甯卽著照此辦理激勵鄉團據險守禦見獲奸細既有由楚取道之言卽當實力防守確探匪蹤毋令闖入遇有可乘之機尤當出境迎擊方操勝算其永明江華藍山各處與粵西毗連亦須兼籌堵禦楚南當兩粵之衝官軍不足必與紳團聯絡勦辦方能得手粵東驛道梗阻文報不通此後偵明賊情卽速馳奏以慰朕念至通城已經收復曾國藩水師近駐嘉魚塔齊布亦往勦崇陽股匪此路一通當可直抵武漢會合進剿所有湖北糧臺事務或卽令胡林翼辦理著飛咨曾國藩等以免貽誤軍行其從前湘陰失事之同城文武著駱秉章查明下

落具奏將此由六百里加緊諭令知之○向榮奏該逆自七月下旬以來疊被官兵痛剿拏獲賊目及城中逃出難民僉稱陸路賊匪四旬之中先後殲斃已不下三萬人精悍賊黨殲除殆盡見在城內之賊均經膽落已往調賊渠章俊羅大綱聚集湖北安徽水陸各賊來此與官軍決戰如其不勝別圖竄擾之計各等語臣探得上方橋西各營該逆均已加高壁壘開挖濠塹並不出戰顯有固守待援之意自橋東兩營被我軍奪據後該逆始不敢渡河而東惟是橋西賊營均與城近而雨花臺賊營又可就近馳救必先斷其應援而後可攻其營壘我軍始不至腹背受敵臣密飭總兵明安泰等帶領兵勇於八月初四日進剿該逆瞭見我軍伏匿不出僅於穴中施放槍礮相持約一時許遙見通濟門出賊三千餘人意欲要我歸路明安泰督同張國棟以兵勇一半攻營一半回

拒正酣戰閒張國樑奮入賊隊遊擊王浚催兵繼進逆勢不能抵敵均向通濟門敗走我兵跟蹤追剿雨花臺內之賊約千餘人又來包鈔亦被我伏兵全數截住賊眾大潰各營之賊一意堅守始終不敢出營接仗臣又訪得太平門外時有奸民貪利與賊貿易因又密派守備李定太蔣錫光帶兵五百名馳往截拏先將長髮賊拏獲二十餘人殺斃三十餘人餘皆向城逃回遂將該處買賣街焚燬拏獲貿易數十人分別懲處伏念臣自上年二月抵金陵後該逆每戰輒敗輒固守以老我之師匱我之餉彼轉得分其兇黨四出攻擾使我兵力處處爲其牽綴自江路斷絕以後太平資糧又被焚燬聞其火藥尤少該逆大困不得不盡力與我相抗此閏七月望後所以悉其醜類屢次殊死戰爭也惟是水師紅單僅二十五隻拖船亦止六隻奉旨調撥下游陳國泰紅單或十號或

十五號見在未能前來而上游楚皖賊船蟻聚蕪湖江南及兩梁山者不下數千將來愈集愈多萬一師船上攻不能迅掃一空而我礮火或有不繼賊船順流乘風而下一經退守勢難再上未免前功盡棄實屬萬分可虞至於浦口一路該逆在彼紮營與九洑洲賊營聲息相通必須先將此處賊營攻燬始可杜其北竄惟須下游水師會剿方能有濟臣已疊次嚴飭總兵武慶李德麟等水陸會籌亟圖掃蕩所慮吳全美師船已單儻再回攻浦口賊船乘虛而下復與金陵陸路相通事機一失尤爲可慮此不能不專望於江北水陸各營也此時已將水路接濟斷絕再將陸路設法嚴斷該逆萬難久延必將悉其逆黨與我力戰臣仰秉廟謨儻能再獲大勝則辦理更有把握而廓清有期矣又奏臣查該逆於前月上旬竄擾九洑洲一帶其地距浦口甚近距武慶營盤與周希

濂艇船均不過數里當時並不實力攻剿任賊從容紮營不知是何居心臣前奉旨分提各船原以扼剿金陵上游今紅單連破賊船不下千號業已扼駐采石磯截斷江面水路極爲得手無如東西兩梁山陸續駛回賊船已有二千餘隻皖楚大幫又將趕回蕪湖嘯聚日多太平尙無兵駐守紅單中流砥柱喫緊萬分若使調回攻剿不特將來上攻匪易賊船順流直下又將蟻聚金陵使陸路之賊困而復蘇水路之舟絕而復續萬一連檣北渡浦口勢益可虞或再下竄瓜州則我船更應接不暇矣臣愚以爲賊之竄擾浦口江面者迹雖北窺竇欲牽掣我師之後若紅單堵住上游使賊船無路下駛我得節節布置水陸會兵由太平以至蕪湖逐漸扼剿而上賊船雖眾亦可漸次掃除前奉旨添調陳國泰之船旣因瓜州攻剿喫緊不能前來吳全美止有二十五船葉常春之船

又未趕到其勢已孤若一經奉調回剿帶兵官有辭可藉正可乘此折回大局一壞實屬不堪設想所有浦口九洲賊營武慶既奮勇由北岸進剿李德麟有船一十九隻豈尙不足圍攻總計下游戰船除陳國泰所領二十五隻之外尙有周士法陳世忠分帶各項艇船亦不下數十隻見又造有多槳快船以之進攻洲地賊巢較紅單尤爲便捷誠如 聖諭所云卽或李德麟各船未能得手亦可就近將周士法陳世忠之船分撥協剿不必專調吳全美紅單駛回以致顧此失彼掣動大局 上諭金陵逆匪自七月下旬疊被官兵痛剿此次上方橋賊營復經向榮派撥兵勇攻剿獲勝逆匪屢受懲創其勢已蹙見在紅單船扼駐采石磯截斷江面水路極爲得手惟東西梁山賊船陸續駛回已有二千餘隻皖楚大幫又將趕回蕪湖太平見尙無兵駐守金陵上游爲逆賊所必

爭吳全美紅單船僅二十五隻葉常春師船尙未趕到該大臣奏稱若調回攻勦不特將來上攻非易而賊船順流直下又將蟻聚金陵萬一北渡浦口更屬可虞所慮情形甚屬周密以見在而論自應多撥船隻扼住上游使賊船不能下駛爲最要機宜著托明阿等仍遵前旨於陳國泰所帶船內分撥十隻或十五隻泝流而上與吳全美師船合力堵勦至九洑洲地方賊營距浦口甚近陸路有武慶營盤水路有周希濂艇船皆去賊營不遠何以任其從容布置於前又不能奮力攻勦於後水師本極疲玩自歸琦善節制稍有起色乃未久又蹈故轍因循積習實堪痛恨所有浦口洲地賊營著卽責成武慶由北岸進勦李德麟見有船十九隻亦足敷圍攻著托明阿等卽嚴飭該員等迅速攻毀儻仍前怠玩不知奮勉卽從嚴參辦至下游紅單挖留廣艇等船共有八九十隻又

有新造多槳快船如李德麟各船不能得力並可就近將周士法
陳世忠之船分撥協勦托明阿見已馳抵軍營著卽統籌全局與
向榮和衷商辦毋得稍分畛域近日瓜州勦賊情形並著托明阿
等速行具奏昨據葉名琛等奏廣東匪徒同時滋事肇慶府城及
高明等縣均被賊陷復敢攻撲省城向榮前調之廣東官兵能否
前來殊難豫定該大臣務就見有兵勇水陸兼籌迅掃賊氛毋稍
延緩奸民接濟賊營火藥必應嚴行禁絕前已諭知陳金綬雷以
誠著托明阿向榮嚴飭各營並地方文武明查暗訪一體搜拏毋
稍疏懈將此由六百里加緊各諭令知之○禮部奏殉難副將希
郎阿應否與謚得旨著毋庸與謚入祠之處亦不必行該員係途
中遇難自應有所區別以後似此者應如何覈減著爾部會議具
奏○丙辰欽差大臣江甯將軍托明阿等奏查看揚州浦口各營

並路過儀徵遇賊水師總兵陳國泰親帶將弁齊駕紅單船直攻瓜州並設伏獲勝得旨水師向惟紅單尙屬得力該鎮人亦奮勇其餘艇師皆疲玩日久習氣甚壞前琦善耗盡心血寬猛相濟纔有可望汝惟有倣照琦善駕馭之法加嚴用之不可稍鬆懷之○丁巳命嚴正基以四品京堂候補以崔侗爲廣東布政使江國霖爲廣東按察使

由鹽運使遷

○戊午諭軍機大臣等前因安徽和州堵

禦喫緊而瓜州攻勦亦當緊要之際雷以誠是否能親往和州當諭托明阿於抵揚後通盤籌畫本日據和春福濟奏稱逆匪於八月初九日水陸並進擾踞和州又於鍼魚背挑築濠塹並有賊船停泊烏江登岸鈔掠直抵全椒南境已派署臬司恩錫統帶熱河等處官兵一千名赴全椒防勦請仍飭雷以誠赴和扼守烏江等語見在和州情形益形喫重堵勦之師刻不可緩雖有恩錫統兵

前往恐攻剿尙難得力此時托明阿已抵揚州瓜州軍務自可督同陳金綬等妥籌辦理著雷以誠於接奉此旨後酌帶兵勇卽日馳赴和州扼要駐紮如瓜州軍營兵勇不敷分撥卽將恩錫帶往之兵歸雷以誠調遣擇要布置務須悉力剿除毋任肆擾至江浦地方爲南北咽喉若水陸兵勇協力同心及早攻剿何至任賊上竄以致重擾和州該大臣等務當懷遵疊次諭旨迅將九洲洲等處賊營剋期攻毀並督飭武慶等嚴密防守不得再有疏虞將此由六百里加緊諭令知之○諭自逆賊竄踞金陵分擾揚鎮繼復攻陷安慶廬州等處蹂躪再及武漢長江之險半爲賊占皆由我軍僅能扼截陸路而水師戰船不敷堵剿以致賊匪橫行江面恣其奔突近來紅單艇各船漸集瓜州等處卽獲勝仗向榮所派之兵亦收復太平進剿至采石磯以下湖南曾國藩統帶兵船見

已沿江東下直抵金口距武昌僅六十里是勦賊兼賴水軍已有明驗惟近日逆賊竄近江西並恐另股由池州甯國進犯徽州窺伺浙境武漢以下金陵以上如安慶九江等處居中扼要之地尙無戰艦阻攔亟應廣籌製造上年曾諭四川湖廣等處雇匠造船嗣因張亮基駱秉章奏業已估買江船並鈞等船是以僅令裕瑞籌助經費見在江面更爲喫緊四川地方完善多產材木購料興工較爲便易著裕瑞督飭湖北藩司夏廷樾辦理戰船以資攻勦或在川購造或但購材木籌撥銀兩帶赴湖南製造與駱秉章迅速商辦前據駱秉章奏該員已由辰沅赴川此項戰船如由川之涪江取徑辰沅勢在曾國藩之後若由夔巫上游徑赴荆江直達漢水當可與曾國藩會合俟江漢道通即可節節攻勦截斷安慶九江兩路賊船著裕瑞與夏廷樾悉心籌議將如何辦理之處

迅速具奏至湖南應備船廠前經紳士丁善慶等設局捐辦著卽
趕緊添造多多益善駱秉章務飭該紳士等分投勸捐庶可多修
戰艦肅清江面以慰朕念將此由六百里加緊諭知裕瑞駱秉章
並傳諭夏廷樾知之○諭和春等奏連日攻剿情形並皖餉緊急
等語和春等攻剿廬州逆匪雖屢獲勝仗總未能堵穴擒渠頓兵
日久籌餉維艱覽奏實深焦急據稱賊於八月初七日擾踞和州
又於鍼魚背挑築濠塹賊船停泊烏江登岸者四五百人四出鈔
掠直抵全椒南境與本日袁甲三所奏大略相同和州爲廬營東
障而全椒爲餉道所經設有疏虞則滁定一帶全行震動於江北
大局關繫非輕必須亟籌防剿該提督等卽迅飭署臬司恩錫統
帶熱河等處官兵前往全椒力遏賊衝毋稍延誤袁甲三因北路
緊要仍駐臨淮見派參將吉連帶兵前往關山擇要堵禦並令盧

鳳道張光第帶兵赴滁和各路鼓勵團練亦可與恩錫聲勢聯絡
互相援應該提督等務須隨時知照袁甲三防剿兼籌以遏逆匪
北竄之路福濟奏安徽被擾各州縣本年錢糧懇恩豁免並密陳
時事維艱不得不收拾人心等語皖省被賊蹂躪地方共二十二
州縣之多赤子何辜罹此慘毒每一念及寢饋難安該撫所請豁
免本年錢糧原不難立沛恩施以紓民力惟各州縣土匪盡授僞
職鄉民率皆從逆此時若徒博豁免之名恐人心未必遽知順
逆前此六安州士民克復州城朕卽加恩豁免三年錢糧以示鼓
勵著福濟先行出示曉諭俾被陷地方紳民人等咸知大義同心
團練誓願殺賊效忠然後再頒恩旨豁免該州縣闔境錢糧庶幾
順逆分明人心思奮俟奏到日再降諭旨至此此外未被兵州縣著
仍遵前旨督飭藩司實力催徵以資軍餉不得顛預具奏置正供

於不問而徒事仰給於鄰省也將此由六百里加緊諭令知之○
諭見在逆賊竄擾沿江各處吳全美師船已進偏東西梁山其瓜
州至焦山一帶有紅單拖督廣艇各船上下橫截曾國藩水師亦
駛至嘉魚金口等處不日克復武漢江路已頗得手惟自安慶至
九江中間扼要之區尙無師船攔阻致賊黨得以任意往來江西
前造戰船近日能否駛至九江以資攻剿該省素產材木著陳啟
邁督飭所屬購料加造若干隻派委幹員管帶出江與上下游戰
船互相策應爲掃蕩賊氛肅清江面之計卽如吳城等處賊船前
已被剿敗退因我軍缺少船隻未能窮追可見水陸兩路必當兼
備著陳啟邁趕緊設法竭力籌辦其義甯武甯近日賊勢若何派
往靖安各勇是否足恃務卽隨時確探前據葉名琛等奏肇慶高
明順德等郡縣被賊匪攻陷城池其韶連各屬賊氛亦甚猖獗江

西與廣東接壤地方並著一面嚴防一面偵明速奏將此由六百里加緊諭令知之○袁甲三奏據江浦等處節次來稟該逆於江浦下新灘等處添設二營並踏平蘆葦通路三條圖踞浦城以通和州烏江一帶又分水陸兩路竄擾和州於和城外江口之鉞魚嘴添築濠塹又有賊船二三百隻停泊烏江登陸者四五百人四出擄掠直至和州北鄉之濮家集距全椒南界河岸僅十餘里查全椒爲北路門戶儻有疏虞則滁鳳一帶全行震動此時雷以誠奉旨留揚和含一路前經和春福濟等飭派署臬司恩錫馳赴該處扼要堵截曾否到彼尙無確信臣已派參將吉連帶兵五百名前往關山一帶擇要堵禦並令廬鳳道張光第帶兵三百名赴滁和各路鼓勵團練以助聲援至臣前擬偏師繞赴南路攻復各城等情應俟東南賊勢稍定再當酌量前往總期防勦兼籌斷不敢

顧此失彼得旨所擬亦是見已有旨令雷以誠迅赴和含以後情
形汝自斟酌略遲遲亦可○予安徽陣亡知縣張埴祭葬世職○
庚申諭軍機大臣等陳啟邁奏擊敗義甯賊匪添調官兵圍剿建
昌德安另股匪徒一摺該省德化縣城尙爲賊踞既須力圖攻剿
嚴扼九江來路而義甯敗竄餘匪復由楚北句結逆黨於瑞昌武
甯一路竄擾建昌德安經陳啟邁添調兵勇馳往夾擊自應嚴飭
該帶兵員弁趕緊進攻先將此股匪黨悉數掃除即可與吳錫光
所帶靖勇會剿武甯之匪該撫所籌布置各情卽著照議相機妥
辦惟水陸兩路面面空虛皖楚逆蹤誠不免伺隙奔突節次諭令
該撫多備師船出江扼截以顧全局今旣據稱所造船廠已有成
數若待湖南舟師東下始行出湖協剿未免迂緩卽新募水勇未
諳紀律亦應卽速訓練遴委水師員弁刻日管帶出江俾資截剿

斷不准屢以餉需支絀藉口遷延至廣東新起土匪勢甚猖獗詔連一帶毗連江西邊境尤應處處嚴防勿令匪蹤闖入長甯雖經獲勝仍須隨時飛飭各該地方文武員弁認真守禦要隘妥爲籌防總之該撫責任封圻無論內匪外寇必當熟籌兼辦方爲不負委任將此由六百里加緊諭令知之○吉爾杭阿奏英吉利領事包哈米利堅麥連勒畢噲佛蘭西布爾布隆先後駛抵上海稱欲變通成約因兩廣總督不肯接見定期八月十八日前赴天津堅執不移勢難阻止命文謙桂良嚴密防範○辛酉諭軍機大臣等本日據楊需奏京山賊匪全數剿滅南兵已偏武漢恐賊全力北竄見籌堵剿一摺湖北賊匪自我兵克復安陸府城後竄回京山本月初間經楊需督飭官兵全行殄滅京山境內肅清天門餘匪亦已無多見由漢川一帶進剿湖南水師行抵金口接仗獲勝距

武昌省城僅數十里計日即可與北師會合攻克武漢所辦尙爲得手惟是賊以南師日偏勢必全力北趨亡命鋌走亟應嚴爲防備且漢川之賊又已竄入涇口窺伺之意顯然雖經楊霈派令襄陽兵勇相機防剿並設法擬將湖中賊船焚燒而漢川黃陂一帶路徑紛歧賊匪均可竄逸北窺信陽等處襄陽兵勇旣經調撥防守稍形單弱楚豫界連防守尤關緊要英桂見駐信陽疊據奏稱飭派兵勇在各邊境嚴密布置著卽於信陽武勝等關加意嚴防毋許稍涉疏虞至豫省各屬捻匪日肆鴟張南汝光等屬毗連楚北匪徒出沒靡常尤恐地多伏莽亟應趕緊殲除先清內患以絕楚賊勾結覬覦之心前據該撫奏稱著名最要捻首尙有李兆受被剿逃回霍邱未獲任純學丁心田等據稱隨同李士林赴楚投誠如未確實均應根究查拏毋任疏脫至楚省情形仍應隨時偵

探與楊需聯絡聲勢隨時戒備豫爲併力堵剿之計毋誤事機將此由六百里加緊諭令知之○諭楊需奏賊撲楊店營盤督剿獲勝並剿滅京山賊匪各等語此次逆匪分撲楊店營盤經楊需督率弁兵勦擊大獲勝仗我軍追殺直抵野豬湖邊賊船見匿湖中漢川之賊亦由湏口入湖該署督見飭遊擊趙鴻舉等加意嚴防並派兵接應著卽嚴飭該員等實力防剿毋令竄入德安府致滋延蔓前經屢次諭令楊需迅速進兵克復武漢見據奏稱賊勢全夥北趨於漢川黃陂一帶水陸屯聚武漢之賊已爲數無多自係因上游勦辦得手故該逆鋌而走險意圖北竄爲牽掣我兵南下之詭計楊需此時自應權其緩急先將北路布置周密然後節節進攻固不可遷延觀望坐失事機亦不可深入重地致該逆乘虛北竄方爲妥善其武漢之賊本日已諭令塔齊布曾國藩水陸並

進迅圖克復該署督亦卽嚴飭魁玉楊昌泗會同李孟羣合力夾擊如能克復武漢則賊巢已破剿辦自易得手其湖中賊船務當趕緊設法全數燒毀毋令久踞至該署督所帶官兵六千餘名各營情形強弱不一惟當實力訓練信賞必罰庶幾漸有起色所挑精銳之兵亦當分配各營毋令疲弱之師萃聚一處致貽後患荆州見在防堵情形較緩楊需所帶兵勇尙形單弱所有前畱荊州之四川練丁一千一百餘名著官文儘數調撥速赴楊需大營再畱荆之防兵能否抽撥助剿並著官文酌量選派以資剿辦將此由六百里加緊各諭令知之○諭前據塔齊布等奏羊樓洞剿賊大獲勝仗並曾國藩搜捕湖河進駐嘉魚擬赴金口會剿各情形當經批令速戰勿令塔齊布一軍爲崇陽所牽掣原以逆賊恃武漢爲老巢若能急破其窟穴則漢江以下餘匪自可迎刃而解本

日據楊需奏京山賊黨已被大軍剿滅惟由白水湖竄駛野豬湖之賊竟於八月十七日分三路攻撲楊店營盤經官兵迎敵擊退賊船伏匿湖中並據探報漢川逆眾有從涇口入湖消息大抵楚省賊情南擊則北竄鋌險狂奔是其慣技塔齊布等自十五日奏到後迄今旬日未見續報朕心實深懸繫據楊需奏塔齊布陸路之師尚在攻剿崇陽咸甯未下見聞武昌漢陽賊眾無多飛飭魁玉揚昌泗會同李孟羣等乘虛攻復等語朕思崇陽一股經普承堯羅澤南等攻破賊卡後計已膽寒惟曾國藩必俟此股蕩事方攻武漢兩下相持若逆匪另逞詭謀則全勢北趨恐楊需兵勇過單未能遏其兇燄而曾國藩所帶均係師船水戰有餘陸攻不足務須與塔齊布妥籌兼顧水陸並進爲克復武漢之計該提督是否能親來督勦或抽派陸路得力將弁與曾國藩會合之處均著

迅速商辦總以擣穴揜渠不被牽掣爲要李孟羣已抵金口魁玉
揚昌泗亦前往武昌亟當乘此聲威各路並舉諒塔齊布曾國藩
接奉此旨必能趕緊進兵勿但專顧一隅也將此由六百里加緊
諭令知之○以湖北勦賊不力革四川建昌鎮總兵官福忻職仍
畱營差遣○壬戌諭軍機大臣等有人奏地方官縱容土匪水手
肆擾請飭查辦一摺據稱江蘇吳江縣土棍陸孝中等以抗拒租
糧爲由斂錢糾眾聚集數千人設立公局製造刀槍火器兵役往
捕卽鳴鑼聚眾抗拒且賄通吳江縣知縣賀際運之門丁崔姓庫
書費熙堂爲內應震澤縣土匪蘇憲章等擁眾滋事拒捕戕差焚
毀震澤縣知縣坐船及巡檢衙署該署縣姚銑帶兵往擊該匪放
槍迎拒旋獲蘇憲章等八人梟示陸孝中等聞風畏懼賄通門丁
崔姓並送妾與賀際運以致歷案不辦匪黨嘯聚愈多入黨者納

錢給予議單皆願鬻子卽願慶榮書寫尙有龐耀采等各分首從皆聽陸孝中調遣又漕船水手兇悍性成賀際運編充內壯凡索賊未遂之案令費熙堂率領水手往提擄掠姦淫無所不至富戶陳姓監生張治山等均被搶掠浙江平陽營兵路過吳江與水手鬪鬪殺死浙兵二名該縣餽送浙營弁兵洋銀二千餘圓捏稱兵丁與百姓爭毆誤傷身死完案等情似此土匪水手恣意肆擾地方官縱暴殃民若不嚴加懲辦何以儆兇頑而安良善賀際運姚銑均著撤任交怡良等提同應訊人證嚴切根究從重參辦並嚴拏土匪水手將爲首滋事各犯卽行正法另片奏吳江震澤兩縣紳民共捐制錢七萬餘串而解司者僅止二萬三千串其餘盡飽官吏囊橐等語著怡良等一併確切查明據實參奏原摺片鈔給閱看將此諭令知之○先是伊犁將軍奕山等奏遵議新疆兵制

未易驟事更張下軍機大臣會同戶部議至是奏查原奏稱伊犁額設滿漢營及四部落官兵一萬五千六百員名分駐九城四愛曼及各卡倫地方控制夷回鎮撫邊屯最關緊要未可驟更駐防滿漢之兵皆遠年內地移眷前來住經數代生齒繁衍遷歸旗籍所費不貲所奏均屬實在情形惟回疆八城換防之兵是否有可變通應令與各大臣等體察情形商同辦理從之○癸亥諭軍機大臣等勝保奏進攻高唐漸可得手情形並繪圖呈覽已於摺內嚴切批示矣勝保圍攻此城已歷數月之久此次殲斃之賊不過百數十名而我兵亦有傷亡竟不能以智謀取勝見既據稱機有可乘期於數日之間力圖克復該大臣自係確有把握儻令垂斃之賊伺隙他竄或仍畱一路任其奔突又燬追勦勢必蔓延他處何時方能淨盡此時賊勢自非從前臨清烏合之眾可比彼時來

之甚速故驅之甚易今則負嵎日久必用全力以制之該大臣惟當妥籌就地剿除之法迅將此股逆眾聚而殲旃庶可以功補過著卽與德勒克色楞等乘此聲勢激勵各營將弁倍加奮勇剋日攻復朕惟盼捷音之速至也將此由六百里加緊諭知勝保並諭德勒克色楞善祿崇恩知之○文謙奏英米兩國船隻於駛抵大沽海口後經都司陳克明等登船詢悉情形詎英人麥華陀忽又乘坐小船駛入口內行過礮臺半里有餘嗣經雙銳錢忻和等與之反復理論始將艇船退出礮臺停泊奏入命文謙詢明來意正言折服○甲子諭內閣怡良吉爾杭阿奏知縣不能約束書吏致釀重案審明定擬一摺江蘇已革署青浦縣知縣余龍光因催比錢糧致差役徐濛等糾同地保周立春聚眾挾制閩堂毆官迫經撤任協緝復未能將首要各犯立時拏獲以致周立春勾結土匪

起意謀逆重煩勦辦雖訊無徵收應免錢糧及貪污實據惟周立春煽惑擾亂根由究因該革員庸劣不職所致余龍光著發往新疆充當苦差以示懲儆○命盛京山東嚴防海口○以守城出力永廣直隸天津府文武學額五名天津縣三名江西南昌府學額五名南昌新建各三名○乙丑楊需奏八月二十四日據遊擊趙鴻舉軍功李玉田等稟報賊船四五百隻駛至劉家壩地方上竄趙鴻舉等督帶兵勇迎至道人橋分三路勦擊殺斃賊匪二千餘人生擒賊目十七名燒燬賊船三百餘隻奪獲賊船六十餘隻餘匪散竄又據蘄水縣際亨稟八月初三日帶羅田縣練勇二千名收復蘄水廣濟二縣城池擒斬賊匪四百餘名又據羅田縣彭仲芳稟派勇會同安徽英山縣收復城池勦滅賊匪又委員楊先澍率敢死士五十餘人潛近野豬湖賊船拋擲火罐李殿善由東岸

施放火箭焚燒賊艦數隻賊眾驚覺四散二十一日賊匪於湖口泊船設卡楊先澍於二更後帶勇改裝潛至附近湖邊之村莊見賊船五十餘隻灣泊湖岸有長髮賊匪數十人分踞村內民房楊先澍卽帶勇突出圍房縱火將民房焚燒並將船隻燒燬斃匪四五百人本日據千總楊世澤等稟報在羅漢寺塘步等處乘夜襲擊賊匪斬殺一百餘名生擒三十餘名追逐三十餘里至大湖嘴地方撲水淹斃者無數又據潛江縣龔煥枝稟探聞漢川縣繫馬口賊匪經沔陽州鄉勇勦擊獲勝又接曾國藩來咨於初八初十十二等日水陸進攻連獲勝仗定於十七十八十九二十等日直擣武昌臣當卽飛咨以賊匪大股在北必可乘虛攻復並飛飭魁玉楊昌泗迅卽進攻漢陽二十二三兩日東南礮聲竟日不絕夜半見有火光必已得手惟漢川黃陂一帶地方賊眾尙有萬人一

經武漢收復必尙有北竄之賊臣一面飛遣偵探一面飛飭參將

常德相機堵剿漢川之賊飭趙鴻舉李玉田嚴防長江埠縣丞王

國楨軍功王瑞山丁心田堵剿新溝一帶佈克慎帶兵進駐瀟口

桂明分兵進駐馬溪河劉富成駐紮孝感楊世澤等駐紮黃陂以

遏四竄之賊又飭黃州府許賡藻於黃岡麻城等縣督帶鄉勇嚴

行堵剿乘勢收復黃州府城派兵扼守以冀一氣掃除勿使稍有

竄逸正繕摺聞據職員楊衍桐遣報二十二日南北省官兵水陸

進攻漢陽當卽帶同商民等數千人接應賊眾驚散卽日克復漢

陽漢口二十三日克復武昌省城賊匪分路逃竄約計尙有萬餘

人各等語理合先行奏陳以慰 聖懷 上諭內閣楊霈奏各路

勦賊屢獲勝仗收復城池一摺另片奏據報二十二日水陸官兵

進攻漢陽將漢陽漢口收復並於二十三日克復武昌等語著將

克復情形詳細馳奏卽著楊霈會同塔齊布曾國藩等盡掃妖氛毋任逃竄其各路勦賊屢次出力在事文武員弁紳士兵勇等著楊霈擇尤保奏候朕施恩以示鼓勵○諭軍機大臣等本日據楊霈奏克復武昌漢陽等語據稱探聞八月二十二日官兵水陸進攻並商民等數千人馳往接應卽克復漢陽漢口二十三日克復武昌省城見在賊匪尙有一萬餘人分路逃竄情形若何尙未據塔齊布曾國藩奏到該逆被勦情急難保不亡命狂奔句結皖省逆匪蔓延爲患著和春等派委得力將弁帶領兵勇於安徽湖北毗連處所扼要嚴守加意防範毋令賊匪竄入勦辦更難得手至廬州等處賊匪被官兵屢次攻勦屢獲勝仗勢極窮蹙著卽督飭兵勇奮力圍攻務當一鼓殲除迅圖克復毋致再有竄逸安慶一帶賊匪尙未殄滅卽著飭令秦定三迅速勦辦毋稍延緩將此由

六百里加緊諭令知之○諭本日據楊需奏稱探聞南北省官兵於二十二日水陸並進糾約商民卽日攻克漢陽漢口二十三日克復武昌省城賊匪分路逃竄約計尙有萬餘人等語覽奏稍慰朕懷想塔齊布等亦卽有捷報在途矣楚北賊匪本恃武漢爲老巢見已破其巢穴則下游餘匪自易剿除惟據稱分竄賊匪尙有萬餘人塔齊布曾國藩等水陸各軍如何剿辦此股餘匪究竟竄往何處未據聲敘明晰該逆被剿窮蹙豕突狼奔蹤迹靡定且漢川黃陂一帶賊匪尙多尤慮勾結爲患楊需駐紮楊店見已諭令進攻黃州趕緊克復並嚴防逆匪北竄塔齊布剿辦崇陽一股是否已就肅清此時武漢收復後卽可會合曾國藩水師併力東下廓清江面該提督等務當與楊需妥商籌辦勿令東下之師爲楚省零匪所牽掣將此由六百里加緊諭令知之○諭楊需奏各路

勦賊獲勝收復蘄水等縣城池繕摺後復據報武昌漢陽均已克復由八百里加緊馳奏等語據稱潰逃餘匪既有四散之勢卽須籌分路追勦並杜其北竄之計雖漢川之賊有常德堵勦長江埠新溝一帶有趙鴻舉王國楨等防堵該署督又已分飭佈克慎進駐瀟口桂明分駐馬溪河劉富成往紮孝感楊世澤等往紮黃陂布置尙屬周妥而黃州郡城久爲賊踞許賡藻所帶僅係鄉勇未必可恃以收復楊需卽可調得勝之師前往黃州一路相機勦辦該處距孝感黃陂等處不遠卽佈克慎桂明劉富成等四路截勦之師均可就近扼擊該署督統領全軍務當通籌大局將楚北餘匪悉數掃除其武漢江面應否酌畱水師扼守之處並著與曾國藩等酌議布置並將攻克武漢情形迅速馳奏至九江安慶尙爲賊匪淵藪已諭令和春福濟陳啟邁加意嚴防仍著楊需不分畛

域互爲聲援毋稍大意此次八百里摺報附有紅旗是否確係該署督所發亦著附便奏聞將此由六百里加緊諭令知之○大學士祁寯藻因病乞休得旨卿宣力有年深資倚任著不必開缺仍在家安心調理亦不必限定假期總宜氣和心平勿生忿憤自可速痊過數月之後再行酌量○丙寅諭內閣常清法福禮奏回子聚眾滋事拏獲審辦一摺喀什噶爾罕愛里克莊回子沙木蒙膽敢糾合同眾詐稱玉素普霍卓後裔在愛吉特虎軍臺等處持械滋鬧燒毀房屋戕害兵民見經常清等派員查辦立將該犯擒獲與聽從使令之斯拉木等十八名一併正法辦理尙屬妥速葉爾羌三品阿奇木伯克阿克拉依都事前毫無覺察本屬咎有應得惟派撥回兵並令親丁幫同伯克技拏賊匪多名尙知奮勉著免其議處喀什噶爾三品阿奇木伯克邁瑪特設法拏獲首要各犯

著文理藩院議敘兵丁李致和迎擊被戕著交部照陣亡例議卹
○命直隸總督桂良籌辦洋務崇綸聽候差遣委用○于福建陣
亡知縣陸友仁等祭葬世職○是月緩徵山西曲沃縣被擾村莊
舊欠額賦蠲臨汾縣上年應徵額賦